



KEMENTERIAN HAL EHWAL EKONOMI

SIARAN MEDIA

LAWATAN KERJA YB MENTERI HAL EHWAL EKONOMI KE NEGERI JOHOR

YB Dato' Seri Mohamed Azmin Ali, Menteri Hal Ehwal Ekonomi hari ini telah mengadakan lawatan kerja sehari ke Negeri Johor bagi merasmikan Hari Statistik Negara 2019 dan Sambutan 70 Tahun Jabatan Perangkaan Malaysia (DOSM) yang diadakan di Dewan Jubli Intan Sultan Ibrahim, Muar, Johor.

Sambutan Hari Statistik Negara telah diisytiharkan oleh Kerajaan Malaysia pada 20 Oktober setiap tahun mulai 2017 sejajar dengan sambutan Hari Statistik Dunia yang diisytiharkan pada 20 Oktober 2010 oleh United Nations General Assembly (UNGA) sebagai pengiktirafan kepada bidang profesional statistik. Bertemakan 'Data Berkualiti Kehidupan Sejahtera', sambutan tahun ini diharap dapat meningkatkan kesedaran rakyat dan peranan penting DOSM sebagai salah sebuah Jabatan di bawah Kementerian Hal Ehwal Ekonomi (MEA).

Penggunaan data dan statistik yang sahih dan tepat amat signifikan dalam perancangan sosioekonomi negara. Bagi menyokong pembangunan negara yang berteknologi tinggi, data dan statistik juga perlu diaplikasikan secara saintifik, kreatif dan inovatif selari dengan perkembangan Revolusi Perindustrian Ke-4.

YB Dato' Seri Mohamed Azmin Ali juga mengadakan lawatan ke tiga tapak projek yang dilaksanakan di daerah Muar seperti berikut:

- i. Projek Pembangunan Pasar Awam Parit Jawa;
- ii. Projek Penambakan Pemecah Ombak Pengkalan Seri Menanti Laut; dan
- iii. Projek Stadium Mini, Astaka, Padang Bola Sepak Sintetik dan Padang Serbaguna Sekolah Kebangsaan Kampung Parit Nawi

Ketiga-tiga projek di bawah peruntukan projek kecil MEA yang dilaksanakan oleh Unit Penyelarasan Pelaksanaan, Jabatan Perdana Menteri ini bakal memberi kemudahan yang lebih selesa dan memenuhi keperluan penduduk daerah Muar serta sekitarnya.

Projek pembangunan di daerah Muar ini adalah sejajar dengan iltizam Kerajaan Persekutuan untuk meningkatkan ekonomi, menjaga kebajikan dan kesejahteraan rakyat dan memastikan kemudahan infrastruktur yang lebih baik dapat dikecapi oleh setiap golongan masyarakat.

Kerajaan Persekutuan dengan kerjasama Kerajaan Negeri akan sentiasa memastikan kemajuan dan pembangunan yang lebih saksama di seluruh negara sejajar dengan Wawasan Kemakmuran Bersama 2030 yang telah dilancarkan oleh YAB Perdana Menteri pada 5 Oktober 2019 yang lalu.

Turut hadir adalah YBhg. Dato' Saiful Anuar Lebai Hussien selaku Ketua Setiausaha Kementerian Hal Ehwal Ekonomi (MEA); YBhg. Datuk Nor Azri Zulfakar, Ketua Pengarah Unit Penyelarasan Pelaksanaan, Jabatan Perdana Menteri; YBhg. Dato' Mohammad Radhi Abdul Razak, Pengarah Bahagian Bajet Pembangunan MEA; YBrs. Dr. Khalid Abdul Hamid, Pengarah Bahagian Industri Perkhidmatan MEA dan Puan Norisan Mohd Aspar, Ketua Unit Statistik MEA.

**Unit Komunikasi Korporat
Kementerian Hal Ehwal Ekonomi**

20 Oktober 2019